

chum oibreachadh 'am measg a' ghuirm, agus 'am measg a' chorcuir, agus 'am measg na scarlaid, agus 'am measg an anairt ghrinn le h-obair ealanta.

4 Rinn iad mìrean-guailne dh'i, ceangailte re chéile<sup>a</sup> air a dà fhoir: *mar sin* chuireadh re chéile i.

5 Agus *bha* crios rìomhach na h-ephoid a *bha* air a h-uachdar, do'n *ni* cheudna, a réir a h-oibre féin; *eadbon do* òr, do ghorm, agus *do* chorcur, agus *do* scarlaid, agus *do* anart grinn toinnte, mar a dh'aithn an Tighearna do Mhaois.

6 Agus dh'oibrich iad clachan onics ceangailte ann am failibh òir, air an gearradh le gearradh feulaidh, le ainmibh chloinn Israeil *orra*.

7 Agus chuir e iad air guailnibh na h-ephoid, *gu bhi 'nan* clacha cuimhneachain do chloinn Israeil, mar a dh'aithn an Tighearna do Mhaois.

8 Agus rinn e 'n uchd-éididh le h-obair ealanta, a réir oibre<sup>b</sup> na h-ephoid, *do* òr, *do* ghorm, agus *do* chorcur, agus *do* scarlaid, agus *do* anart grinn toinnte.

9 Bha i ceithir-chearnach; rinn iad an uchd-éididh dà-fhillte: réis a fad, agus réis a leud; *bha i* dà-fhillte.

10 Agus chuir iad innte ceithir freathan chlach: a' *cheud* freath, fardius, topas, agus carbuncul: *so* a' cheud freath.

11 Agus an dara freath, emerald, saphir, agus daoimein.

12 Agus an treas freath, ligur, agat, agus ametist.

13 Agus an ceathramh freath,

beril, onics, agus iasper: *bha iad* air an ceangal ann am failibh òir 'nan fuidheachadh<sup>c</sup>.

14 Agus *bha* na clachan a réir ainmeanna chloinn Israeil, a dhà-dheug a réir an ainmeanna, le gearradh feulaidh, gach aon aca le h-ainm féin, a réir an dà thréibh dheug.

15 Agus rinn iad air an uchd-éididh slabhruidhean aig na cinn, a dh'obair shnìomhta dh'òr fìorghlan.

16 Agus rinn iad dà fhàil òir, agus dà fhàinne òir: agus chuir iad an dà fhàinne air da cheann na h-uchd-éididh.

17 Agus chuir iad an dà *slabhruidh* shnìomhta òir 'san dà fhàinne air cinn na h-uchd-éididh.

18 Agus dhaingnich iad da cheann na dà *slabhruidh* shnìomhta 'san dà fhàil, agus chuir siad iad air mìribh-guailne na h-ephoid air a beulaobh.

19 Agus rinn iad dà fhàinne òir, agus chuir siad iad air da cheann na h-uchd-éididh air an iomall dith, a *bha* air taobh na h-ephoid a fìgh.

20 Agus rinn iad dà fhàinne òir *eile*, agus chuir siad iad air da thaobh na h-ephoid gu h-ìosal, leth ris a' chuid bheoil dith, fa chomhair a coi'-cheangail *eile* os ceann crios rìomhach na h-ephoid.

21 Agus cheangail iad an uchd-éididh leis a fàinnibh re fàinnibh na h-ephoid le h-éill ghuirm, a chum gu'm bitheadh i os ceann crios rìomhach na h-ephoid, agus nach biodh an uchd-éididh air a fuasgladh o'n ephoid.

<sup>a</sup> g'a ceangal re cl'éile.

<sup>b</sup> cosmhuil re obair.

<sup>c</sup> dùnadh, cur.